

ვახტანგ გურული

კრებულში შევიდა გოდერძი ჩოხელის შემოქმედებისადმი მიძღვნილი წერილები. წერილების ნაწილი ქართულ პრესაში გამოქვეყნდა, ნაწილი კი პირველად იბეჭდება.

## მართალი გოდერძი

გოდერძი ჩოხელის შემოქმედების  
ბაზრების  
მოკრებულში ცდა



გამომცემლობა „უნივერსალი“  
თბილისი 2010

© ვ. გურული, 2010

გამომცემლობა „უნივერსალი“, 2010

თბილისი, 0179, ი. ჯავახიშვილის გამზ. 19, ☎: 22 36 09, 8(99) 17 22 30  
E-mail: universal@internet.ge

ISBN 978-9941-17-026-3

## ნუ ბაახმობო მხარზე ამოსულ ნაძვს!

გოდერძი ჩოხელის სიცოცხლეშივე გამიჩნდა მისი შემოქმედებისადმი მიძღვნილი წიგნის დაწერის სურვილი. დიდი ხნის ფიქრის შემდეგ გადაწყვიტე: ვერანაირი წიგნი ვერ წარმოაჩენს გოდერძი ჩოხელის შემოქმედებას. ასეთი წიგნის წაკითხვას სჯობია გოდერძის ერთი მოთხრობა წაიკითხო, ერთი ფილმი ნახო. დღემდე აზრი არ შემიცვლია. მიუხედავად ამისა ზოგჯერ მიჩნდება ხოლმე სურვილი რაიმე დავწერო. ჩემი აზრის ქალაქზე გადატანისაგან მაინც თავს ვიკავებდი, მეშინოდა რაიმე ისეთი არ დამეწერა, რაც გოდერძის არ მოეწონებოდა. და თუ მაინც ვებედავ წერას, ეს იმიტომ, რომ ის, რასაც დღეს მკითხველის სამსჯავროზე გამოვიტან ბევრჯერ მითქვამს გოდერძისთვის, ის იყო ჩემი მოკრძალებული ნაფიქრალის პირველი მსმენელი და შემფასებელი.

გოდერძი ჩოხელი რომ გავიცანი, იგი უკვე დიდების მწვერვალზე იდგა. ტრიუმფით სვლამ გოდერძი, როგორც ადამიანი ვერ შეცვალა, იგი დარჩა დიდ ბავშვად. ზოგჯერ დაუჯერებელ ამბებს ყვებოდნენ მისი გულუბრყვილებისა და არამწიერების თაობაზე. მიუხედავად ამისა გოდერძი ჩოხელთან ჩემმა პირველმა შეხვედრამ ყოველგვარ მოლოდინს გადააჭარბა. წარმოიდგინეთ თბილისის სახელმწიფო უნივერსიტეტი, სტუდენტებით გადაჭედილი დერეფანი, გზას მუჯღუგუნებით თუ გაიკვლევი, საშინელი ხმაური. დეკანატში შემოვიდა თანამშრომელი ქალი და შეშფოთებულმა მითხრა: „საათზე მეტია ფანჯარასთან დგას გოდერძი ჩოხელი, არაფერს არ ამბობს, უხეხულია სანამდის უნდა იდგეს ასე!“ მე სასწრაფოდ გავედი, გოდერძის მივესალმე და ჩემი თავი გავაცანი. კაბინეტში შემოვედით. ცოტა ხნის შემდეგ მოსვლის მიზეზი ვკითხე. გაირკვა, რომ სწორედ ჩემთან ჰქონდა საქმე. იმდენად მოკრძალებული ადამიანი იყო, რომ კაბინეტში შემოსვლა ვერ გაეებდა, ელოდებოდა როცა მომსვლელ-წამსვლელი დაიღოდა. მორიდებით ვუსაყვედურე. დარცხვენოდა მიპასუხა: „რავი აბა, ამდენი ხალხი ირეოდა, მე კი არსად მეჩქარება, მაინც ნინოს კელოდები“. გაირკვა, რომ გოდერძი მეუღლესთან, ქალბატონ ნინოსთან, ერთად მოსულიყო უნივერსიტეტში. ამ დღიდან დაიწყო ჩემი და გოდერძის ნაცნობობა.

ყველა ჩვენი საუბარი, შეხვედრისას თუ ტელეფონით, მხოლოდ და მხოლოდ გოდერძის შემოქმედებას ეხებოდა. როცა ჩემი ნათქვამიდან გამომარკვევდა, რომ სწორად ჩავწვდი მისი შემოქმედების არსს, თვალები გაუბრწყინდებოდა. თუ ვცდებოდი არასდროს შენიშენას არ მომცემდა, მოკლედ მიპასუხებდა: „აბა რავი“. კონკრეტული შენიშვნა მხოლოდ ერთხელ მომცა. იმ დღეს დიდხანს ვისაუბრეთ გოდერძის ერთი მოთხრობის თაობაზე, მე ჩემი ნაფიქრალი დაწვრილებით გაეცანინი, გაიღიმა და მითხრა: „ე რამდენი გიფიქრია ამ პატარა მოთხრობის შესახებ, მე მაგდენი არ მიფიქრია, ერთი ამბავი აღვწერე, ეს იყო და ეს“. ეს „ამბავი“ მე დღესაც გოდერძის ერთ-ერთ საუკეთესო მოთხრობად მიმაჩნია.

XX საუკუნის 70-80-იანი წლები ქართული მწერლობის, ქართული კინოს დიდი აღმავლობის პერიოდი იყო. იმხანად ვერ ვაცნობიერებდით, გვიან მივხვდით, რომ ჩვენს თვალწინ უამრავი საოცრება ხდებოდა. საოცრებათა შორის საოცრება იყო გოდერძი ჩოხელის პირველი მოთხრობები და ფილმები. შემოვიდა გოდერძი ჩოხელი ქართული მწერლობასა და კინოში, არაგის არ გაჯიბრებია, არაგის ადგილის დაკავება არ უცდია, დაიკავა ის ადგილი, რომელიც უფლის ნებით მხოლოდ მისთვის იყო განკუთვნილი. აფორიაქდა „ძველი სამყარო“. ჯერ იყო და, თითქოს ვერ შეამჩნიეს. როცა „არშემჩნევა“ შეუძლებელი

გახდა, მაშინ ფარისევლებმა ზემოდან დაუწყეს ცქერა „ვილაც გუდამაყრელ ბიჭს“. ნიჭმა მაინც იპოვა გზა. გოდერძი ჩოხელს მოშურნეებთან ერთად უამრავი თაყვანისმცემელიც გამოუჩნდა. ყოველი მოთხრობა, ყოველი ფილმი კიდევ უფრო ზრდიდა მის ნიჭიერების მაღიარებელთა რიცხვს. გოდერძი ჩოხელის შესახებ საუბრობდნენ დიდი სიყვარულით, დიდი სითბოთი. გოდერძისთან მეგობრობა საამაყოდ ითვლებოდა. გავიხსენებ ერთი სტუდენტის ნამბობს. გოდერძი სტუდენტულაქში ყოფილა მეგობრებთან მიწვეული. დაუგვიანებია. წვეულებაზე მისულს მხრებით მიუტანია ძლიერი ქარისაგან ფესვებიანათ მოგლეჯილი პაწია ხე და უთქვამს: „ქარს მოეგლიჯა, შემეცოდა, მარტო ვერ დავტოვე და თან წამოვიღე!“ ამ ამბავს რომ ვიხსენებ, ბუნებრივად მიჩნდება აზრი: გოდერძი ჩოხელი თავად იყო მისი ყველა მოთხრობის გმირი: ვაჟი გოგიც, ბერიც, მაქსინაიც, გამიხარდაიც, ბიბლაიც, შულლაიც, სტეფანეც, ახლახუნეც, სებაც, თადეოზიც, ლუკაც... გოდერძი ჩოხელი მაქსინასავით თავადაც დაუფიქრებლად გაჰყვებოდა მიწაზე დაშვებულ არწივს უკან, ზეცაში; თავადაც ბერისავით უყოყმანოდ ჩაიმარხებოდა მიწაში მხარზე ამოსული ნაძვი რომ არ გამხმარიყო და გამიხარადასავით, ადამიანად ყოფნა რომ მობეზრდებოდა, თევზად გადაიქცეოდა...

გოდერძის ყოველი ახალი მოთხრობა, ყოველი ახალი ფილმი სულ უფრო მეტად აბოროტებდა მის მოშურნეებს.

გოდერძი რომ ჩვეულებრივი ადამიანი ყოფილიყო, იგი ადვილად ჩაიკარგებოდა ნიჭიერ შემოქმედთა შორის და „ჩვეულებრივთა“ შორის დაიკავებდა ადგილს. ეს არ მოხდა იმიტომ, რომ თავის რჩეულს უფალი „დიდთა საქმეთათვის“ ამზადებდა.

გოდერძი ჩოხელი ყოველ წუთს გრძნობდა ჩასაფრებულ მოშურნეთა მზერას, ცინიზმს, ბოღმას. მის ყოველ ახალ მოთხრობას, ყოველ ახალ ფილმს ღირსეული ადამიანები, აღიარებული პროფესიონალები თუ უბრალო, რიგითი მკითხველები აღტაცებით ხედებოდნენ, გულში იკრავდნენ გოდერძის. იყვნენ ისეთებიც, რომლებიც ყოველნაირად ცდილობდნენ დაეკნინებინათ გამოსვლისთანავე შედეგად აღიარებული მოთხრობები და ფილმები.

ადამიანურ მანკიერებას გოდერძი სულგრძელობასა და მიმტევებლობას უპირისპირებდა. მე არასდროს მინახავს ვინმეზე გაბოროტებული გოდერძი ჩოხელი, თუმცა ბევრი რამ, რაც მის გარშემო ხდებოდა, არ მოსწონდა, ვერ ეგუებოდა, გულს ტკენდა...

ავტორთა კოლექტივთან ერთად საქართველოს ისტორიის სახელმძღვანელოს ვწერდი. კარგად მახსოვს, როგორ მოვიდა ჩემთან რამდენიმე, საზოგადოებაში მიღებული ადამიანი და XX საუკუნის მეორე ნახევრის ქართული მწერლობისა და კინოს ისტორიიდან გოდერძი ჩოხელის გვარის ამოღება მთხოვა. ერთ-ერთმა მათგანმა გოდერძის

ნაცვლად წიგნში შესატანად საკუთარი კანდიდატურა წარმომიდგინა. საკმაო ხანი დაეყავი ამ ქვეყნად და ასეთი უზნეო ადამიანი არც მანმადე და არც შემდეგ არ შემხვედრია. მე ეს ამბავი გოდერძისთვის არ მითქვამს. თუმცა გოდერძიმ, ცხადია, გაცილებით მეტი იცოდა. იცოდა ისიც, რომ მისი „კრიტიკა“ ყოველთვის ერთი ცენტრიდან იყო ხოლმე შეკვეთილი. ერთმა საზოგადოებაში ძალზე პოპულარულმა მოღვაწემ მავანის დავალებით მწერალთა კავშირში „კრიტიკის ქარცეცხლში“ გაატარა გოდერძი ჩოხელის შედეგრი „ადამიანთა სევდა.“ გოდერძის იმდენად ეტკინა გული, რომ ლამის იყო წონასწორობა დაკარგა. მწერალი პასუხს ითხოვდა კითხვაზე: რატომ არ მოსწონდა მომხსენებელს „ადამიანთა სევდა?“ პასუხს კი, ცხადია, ვერავინ გასცემდა. 1987 წელს საქართველოს კინემატოგრაფისტთა ყრილობაზე ასევე საზოგადოებისათვის კარგად ცნობილმა პიროვნებამ გოდერძი ჩოხელის ფილმების უკბილო კრიტიკა წარმოადგინა. ყველასათვის ცხადი იყო, რომ ეს კრიტიკა ასევე შეკვეთილი იყო. ერთხელ გამბედაობა გამოვიჩინე და ქართულ მწერლობაზე საუბრისას განვაცხადე: „გოდერძი ჩოხელი, რომ დიდი ერის შვილი იყოს, მისი „მგელი“ აუცილებლად ნობელის პრემიით აღინიშნებოდა!“ ერთმა ადამიანმა, რომელსაც ყველა სამეცნიერო ხარისხის, წოდებისა და პრემიის მიღება მოესწრო, ცინიკურად გადმომხედა და მკითხა: „თქვენ იცნობთ გოდერძი ჩოხელს?“

იმხანად გოდერძი ჩოხელს არ ვიცნობდი. ის ცინიკოსი მხოლოდ გოდერძის მტერი არ იყო, იგი საქართველოს მტერი იყო!

საქართველოში განსაკუთრებული ნიჭით დაჯილდოებულ მწერალსა და რეჟისორს რა დაღვეს! დიდხანს ვფიქრობდი, მინდოდა მეპოვა პასუხი კითხვაზე: რით იყო ნიჭიერთაგან გამორჩეული, განსაკუთრებული გოდერძი ჩოხელი? – გოდერძი ჩოხელი გამორჩეული იყო იმით, რომ ყოველი ფილმით, ყოველი მოთხრობით იგი ქმნიდა თავის სამყაროს. მწერლის თითოეული სიტყვა და ფრაზა ამ სამყაროს შექმნას ემსახურებოდა. გოდერძი ჩოხელის სამყაროში წაშლილია ზღვარი ადამიანებს, ცხოველებს, ფრინველებს, მცენარეებს შორის. ისინი ყველანი ერთი მთელის განუყოფელი ნაწილები არიან, მათი არსებობის წესია ერთ მთლიანსა და ჰარმონიულში არსებობა. გოდერძი ჩოხელმა წაშალა ზღვარი ამქვეყნიურსა და იმქვეყნიურს შორის, სიცოცხლესა და სიკვდილს შორის, „ადამიანად ყოფნასა“ და „ადამიანად არყოფნას“ შორის. ამიტომ, რომ არ დასცილდნენ ერთმანეთს გოდერძის არწივი და ადამიანი, ამიტომ, რომ ადამიანმა არ მოიგლიჯა მხარზე ამოსული ნაძვი, მიწაში ჩაეფლო, რომ ნაძვისათვის სიცოცხლე შეენარჩუნებინა, ხოლო ადამიანად ყოფნა რომ მობეზრდა, თევადად გადაქცევა არჩია.

გოდერძი ჩოხელს უთქვამს: ვაჟა ღმერთს ჩამოუვარდა ზეციდან, მე ვაჟას გავეუვარდი ჯიბიდანო! ესეც უთქვამს: ვაჟას ვაზნა ვარ, ჯერაც თოფიდან გაუსროლელო! გოდერძი ვერ იტყოდა, უფრო ზუსტად არ იტყოდა იმას, რაც ჩვენ უნდა ეთქვათ. გოდერძი ჩოხელი ქართულ მწერლობაში შემოვიდა ვაჟა-ფშაველას მოვლენიდან ერთი საუკუნის შემდეგ. რომ არ ყოფილიყო ვაჟა მაშინ ჩვენი აღტაცება გოდერძის შემოქმედებით სრულიად ბუნებრივი იქნებოდა. გოდერძი ჩოხელი დიდია იმიტომ, რომ მისმა შემოქმედებამ ვაჟას შემდგომი ქართველობა გააოცა, გააოგნა და აღაფრთოვანა. გოდერძი ჩოხელი ვაჟას მემკვიდრეა ქართულ მწერლობაში! ყოველივე, რაც ზემოთ მოგახსენეთ, სიტყვა-სიტყვით მაქვს ნათქვამი გოდერძისათვის. ყურადღებით მისმენდა, ბოლოს თავი ჩაღუნა და ისე, რომ თავი არ აუღია, მითხრა: „მართლა ასე ფიქრობ?“ მივხვდი, რომ მისთვის ძალიან ფაქიზ საკითხს შეეგებე. გადავწყვიტე, ცოტა გამემხიარულებინა მძიმე ფიქრებში წასული. ამიტომ იყო, რომ ვუთხარი: „გოდერძი, კაცობრიობის ისტორიის დასაბამიდან ადამიანები ძირითადად ორი რაიმეს – თანამდებობის მიღებისა და ფულის მოხვეჭის მიზნით ცრუობენ. შენ ჩემთვის თანამდებობის ბოძება არ შეგიძლია, არც ფული გაქვს, რომ მომცე. ასე რომ, მე შენგან არაფერს არ ველო, მერწმუნე, რაც გითხარი, გულწრფელად გითხარი“. სიცილი აუვარდა, იცინოდა ლაღად და გულიანად. ასეთი

გახარებული, ასეთი მომლიმარი გოდერძი ჩოხელი მე პირველად და უკანასკნელად ენახე.

გოდერძი ჩოხელთან მეგობრობა წამიერად მისი სამყაროს ნაწილად მაქცევდა ხოლმე. მე ვიგრძენი: ჩემ მიერ წინათ აღქმული სამყარო რა უფერული, უინტერესო, ერთფეროვანი ყოფილა! გოდერძი ჩოხელის სამყაროში თუნდაც წამიერად გადასახლებაზე მე შემადლებინა ამეხსნა, თუ რას გვიკვირებდა მწერალი: „ნუ გაახმოებთ მხარზე ამოსულ ნაძეს!“

ჯერ კიდევ ახალგაზრდობაში შეერყა გოდერძი ჩოხელს ჯანმრთელობა. ეს არ იყო არაადამიანური შრომის შედეგი. გოდერძის შექმნილი კიდევ ათასი მოთხრობა დაეწერა, გადაეღო ბევრი ფილმი და დიდხანსაც ეცოცხლა. გოდერძის გულმა ვერ გაუძლო იმას, რაც მის გარშემო ხდებოდა. გოდერძის გულს ტკენდა ყველაფერი: ირემს რომ კლავენ, არწივს რომ გალიაში ამწყვდევენ, ხეს რომ ჭრიდნენ, ყვავილს რომ თელავდნენ, ხარს რომ დასაკლავად იმეტებდნენ, ჩოხი და ბევრი სხვა სოფელი რომ იცლებოდა, ჭირი რომ მრავლდებოდა და ჭირისუფალი კი მცირდებოდა. გოდერძის გულს ტკენდა ის, რასაც ჩვენ გულგრილად აღვიქვამთ. რამდენჯერაც არ უნდა გაველო უინვალში, გოდერძი ჩოხელს მუდამ აგონდებოდა „ძველი უინვალი“, თავისი „პატარა ეკლესიებით“, წყალსაცავის ქვეშ რომ მოჰყვა. ახსენდებოდა გუდამაყარი და გუდამაყრელები ისეთი,

როგორც მან ნახა და როგორსაც ვეღარასოდეს ვეღარ ნახავდნენ მისი შვილები და შვილიშვილები. ეს დიდი ტკივილი და კიდევ რამდენი ასეთი ტკივილი სიცოცხლის ბოლომდე ატარა გოდერძის გულმა. მის გულში არსებულ საქვეყნო (საკაცობრიოც!) სატკივარზე იშვიათად საუბრობდა. თუ სატკივარს ვინმე მიუხვდებოდა, თავლები გაუბრწყინდებოდა, ცას ეწეოდა ხოლმე სიხარულით. სატკივრის წამალი თავად არასდროს უძებნია. მისი მალამო ისეთი გულის ადამიანი იყო, როგორი გულიც თავად გოდერძის უძებრდა მკერდქვეშ. ასეთი ადამიანები კი ვერ იპოვა გოდერძი ჩოხელმა! ვერ იპოვა და თავად გამოიგონა. გოდერძის მიერ გამოძერწილი ადამიანები: ბერი, მაქსინაი, გამიხარდაი, ბიბლაი, შულლაი, ანლახუნე, თადეოზი, ლუკა, სება და მარავალი სხვა – სწორედ ის ადამიანები იყვნენ, რომლებიც რეალურ ცხოვრებაში ვერ იპოვა გოდერძიმ. რაც იცოცხლა, სწორედ მის მიერ შექმნილი გმირების სამყაროში იცოცხლა. გული მაინც სტკიოდა. სტკიოდა იმიტომ, რომ ცოტანი იყვნენ მისი სამყაროს გმირები. იმიტომ იყო, რომ დაუცხრომლად ძერწავდა ახალ გმირებს. ყოველი ახალი მოთხრობა კიდევ ერთ ან ორ გმირს მატებდა მის სამყაროს. თუმცა ესეც საკმარისი არ იყო, მაინც ცოტანი იყვნენ. უკმარისობის გრძნობა თან სდევდა გოდერძის პირველი მოთხრობის დაწერიდან, პირველი ფილმის გადაღებიდან სიცოცხლის ბოლომდე. გულმა ვეღარ გაუძლო. გოდერძი

გრძნობდა, რომ ათასი გამიხარდა, ათასი ბერი, ათასი სება რომ შეეკმნა, იგი სამყაროს მაინც ვერ შეცვლიდა, სანამ იცოცხლებდა, უნდა ეცოცხლა მისი შექმნილი გმირების გარემოცვაში. ადამიანები კი მაინც ისეთები რჩებიან, მათ უმრავლესობას ცოდვიანი ცხოვრება არ ეთმობა. ამის აღიარება, ამის დაჯერება არ უნდოდა გოდერძის. გოდერძი ჩოხელი დარწმუნდა, რომ მის გარშემო არსებულ სინამდვილეს იგი ვერასდროს შეეგუებოდა. ყველაფერმა ამქვეყნიურმა გოდერძისთვის აზრი დაკარგა... „ადამიანად ყოფნის ტკბილი სევდა” დასრულდა, დაიწყო „ადამიანდ არყოფნის სევდა”. აკი თქვა კიდევ: „სიკვდილი ვალია, უნდა მოიხადოს კაცმა ვალი”.

სამთავროს დედათა მონასტრის ეზოში რჩეულ ქართველთათვის განკუთვნილმა მიწამ მიიბარა გოდერძის ნეშტი. სული კი ამაღლდა ზეცად და ვაჟას დაუდგა მარჯვნივ

26 მაისი, 2010 წელი

## მართალი გუთულა ცოდვილთა შორის

აუცილებლად დადგება დრო, როდესაც გოდერძი ჩოხელის „საზიარო ყვაეს” მკითხველი მწერლის სახელისა და გვარის გარეშე მოიხსენიებს. ეს ბედი არ ასცდება გოდერძის კიდევ ბევრ მოთხრობას, რომანსა და ფილმს. ეს იქნება მწერლისა და რეჟისორის უკვდავების უტყუარი დასტური!

გოდერძის უკვდავება მისი ერთ-ერთი პირველი მოთხრობიდან – „საზიარო ყვავიდან” დაიწყო. მოქმედება გუდამაყრის სოფელ ჩოხში ვითარდება. ქართველი, გუდამაყარი თვალითაც რომ არ ენახოს, ადვილად წარმოიდგენს ულამაზეს ხეობას ბუბერაზი მთებით და არაგვით, „ტალღაზე მთხვევა” რომ მოგინდება; თავისი ძალისა და ღირსების სრულიად შემცნობი ცაში მონაგარდე არწივებით, ბანიანი სახლებით და იშვიათი, ფაქიზის სულის ადამიანებით. ქართველი, ასევე ადვილად წარმოიდგენს, როგორ გამოჩნდება მალღა, ცაში, შავი წერტილივით ყვავი და როგორ დაეშვება ძირს – მოსამართლის ქულისაკენ. ყოველივე ამას უცხოელი ვერ წარმოიდგენს. მიუხედავად ამისა, უცხოელისათვის „საზიარო ყვაე“ მშობლიურით

ადვილად აღსაქმელია. ადვილად აღსაქმელია იმიტომ, რომ შედეგია, შედეგს კი გეოგრაფიული, ეთნიკური, რელიგიური, სოციალური და საერთოდ არანაირი საზღვარი არა აქვს. შედეგის ყველას საკუთრებაა...

და მაინც, „საზიარო ყვავს“ ქართველსათვის გაცილებით მეტი ღირებულება აქვს. მოთხრობის სიუჟეტში არის ადგილები, რომელთა ნიუანსობრივი გააზრება შედეგის აღქმისათვის სულაც არ არის საჭირო, მაგრამ საჭიროა თემისათვის – გოდერძი ჩოხელი, როგორც მისი თანამედროვე სინამდვილის პროტესტი.

„საზიარო ყვავი“ XX საუკუნის 70-იან წლებში დაიწერა. ეს ის დრო იყო, როდესაც საბჭოთა ციხეები სახსე იყო „სხვაგვარად მოაზროვნებით“, რეპრესიები არ წყდებოდა. იმხანად ვერავინ წარმოიდგენდა, რომ 1991 წელს საბჭოთა იმპერია სერიოზული გაბრძოლების გარეშე დაიშლებოდა. ველიკოდერჟაველი აზროვნება განუყოფლად ბატონობდა კრემლის პოლიტიკურ ლიდერთა შორის. უზარმაზარი იმპერია იმართებოდა პრიციპით: ძალა თუ გაქვს, ჭკუა არ გჭირდება. აი, ასეთ ვითარებაში იწერებოდა „საზიარო ყვავი“.

„საზიარო ყვავი“ იწყება მოსამართლისა და სოფლის დეკანოზ ბუთულა ჩოხელის დიალოგით – ბუთულას დაკითხვით. მწერალი მოვლენის დროში ლოკალიზებას განგებ არ ახდენს. მიუხედავად ამისა, აშკარაა, თუ რომელ

ეპოქაში ხდება ამბავი... საქმე საბჭოთა სასამართლოში იხილება. ამაზე სულ რამდენიმე წინადადებით მიანიშნებს მწერალი. მოსამართლე შეიტყობს ბუთულას მიერ ყვავის მოწინააღმდეგის ამბავს და ეკითხება დეკანოზს:

– მოიცა, მოიცა... თქვენ გყავდათ საკუთარი ყვავი, არა?..

აშკარაა, რომ მოსამართლე შეშინდა, შეშინდა იმიტომ, რომ არ იცოდა, ბუთულას მიერ ყვავის კერძო საკუთრებად ქცევა კანონსაწინააღმდეგო ქმედებად ჩაეთვალია თუ არა. დაბნეული მოსამართლე დროს იგებდა. სწორედ ამიტომ წარმოთქვა გაურკვეველ ვითარებაში ჩავარდნილი საბჭოთა მოსამართლეებისათვის ჩვეული სიტყვა:

– გასაგებია.

ბუთულასათვის კი ყველაფერი გაუგებარი იყო და ამიტომაც კითხვაც ბუნებრივად დასვა:

– რა არის გასაგები, კაცო?

ამას კი ბრიყვი, მაგრამ ცბიერი მოსამართლე აღარ ელოდა. თანამდებობის დაკარგვის შიშით შეპყრობილი თემიდას მსახურისაგან ბუთულა გასაგები ენით საუბარს ითხოვდა. მოსამართლე ისევ დროს იგებდა. ბუთულას დაშინების მიზნით იგი შეტევაზე გადავიდა და გაბრაზებულმა ისევ უაზრო პასუხი მისცა:

– ის, რომ თქვენ მისაკუთრეთ ყვავი, გესმით?



იყო თუ არა ყვავის მისაკუთრება კანონით დასჯადი ქმედება, მოსამართლემ არ იცოდა, ამიტომ იყო, რომ ბუთულას ბრალი ვერ წაუყენა. კანონებში ვერც ბუთულა ერკვეოდა, მაგრამ იმას კი მიხვდა, რომ მოსამართლე მის მიმართ კეთილად არ განეწყო. თავისი უდანაშაულობის დამტკიცება დეკანოზმა ბუთულა ჩოხელმა მორწმუნე ადამინისათვის სრულიად ბუნებრივი გზით სცადა. დეკანოზმა აზრი მოიკრიბა და დაიწყო:

- ღმერთია მოწმე...მე...

აქ კი გოდერძი ჩოხელმა უკვე პირდაპირ მიანიშნა საბჭოთა ეპოქაზე და საბჭოთა სასამართლოზე. გგანრისხებულმა მოსამართლემ ბუთულას სიტყვა გააწყვეტინა:

- ღმერთი! ღმერთი არ გამაგონო!

შეშინდა ალბათ უკვე მრავალგზის დაშინებული დეკანოზი ბუთულა და ძლივს წაიღულღულა:

- მაპატიეთ... ეს ისე...

მეტის თქმა საჭირო აღარ იყო. მწერალმა სულ რამდენიმე წინადადებით შეძლო დაეხატა საბჭოთა მოსამართლის პორტრეტი.

თუ რა საფრთხე ემუქრებოდა გოდერძი ჩოხელს საბჭოთა სასამართლოს და მოსამართლის ასე გაშარუებით, დღეს შეიძლება მთელი სისრულით ვერც წარმოიდგინოს ახალგაზრდა მკითხველმა. ეს სიტყვები იწერებოდა 25-30

წლის წინათ, იმ პოლიტიკური რეჟიმის პირობებში, რომელიც „სხვაგვარად აზროვნებას“ გამორიცხავდა. მეტის გაკეთება იმხანად შეუძლებელი იყო. მკითხველი ისედაც მიხვდებოდა: გოდერძი ჩოხელის მთელი არსება ეწინააღმდეგებოდა პოლიტიკურ რეჟიმს... ვინ იცის, რამდენ ქართველს დაედო მაღამოდ გულზე გოდერძი ჩოხელის სიტყვები, რამდენ ქართველს აგრძნობინა მწერალმა, რომ უთანასწორო ბრძოლაში ის მარტო არ იყო...

სიუჟეტის პოლიტიკური პამფლეტის ფორმით გაგრძელება სახიფათო იყო მწერლისათვის. ამიტომ, რომ გოდერძი ჩოხელმა თხრობას კომიკური შინაარსი მისცა და საბოლოოდ აბსურდამდე მიიყვანა. აბსურდი კი ერთნაირად ამხიარულებს გონიერ მკითხველსაც და მრისხანე დიქტატორსაც. მიუხედავად იმისა, რომ ამ აბსურდის ერთ-ერთი მთავარი მოქმედი პირი ისევე ის ცბიერი საბჭოთა მოსამართლეა, მოთხრობა პოლიტიკურ სიმწვავეს კარგავს და მხატვრულ შედეგად იქცევა. აბსურდი ხშირად იმასაც კი ღიმილს ჰგერის, ვინც მასში თავის თავს ხედავს.

გოდერძი ჩოხელს ჰქონდა ერთი თვისება. მოიგონებდა ისეთ სიუჟეტს, რომელიც შეიძლებოდა მხოლოდ გენიოსს შეეტხზა. და როცა მკითხველი აღტაცებული რჩებოდა უნიკალური სიუჟეტით, გოდერძი მოკრძალებით იტყოდა: ეს ამბავი მე არ შემითხზავს, ნამდვილად მოხდაო! გოდერძის ტყულის თქმა არ შეეძლო. მე დარწმუნებული

ვარ, რომ გარკვეული პერიოდის შემდეგ გოდერძის მართლა სჯეროდა, რომ მის მიერ მოთხრობილი ამბები მართლაც მოხდა გუდამაყარში, უმრავლესობა კი - სოფელ ჩოხში!

დავიწყეთ იმით, რომ გოდერძი ჩოხელმა ყვაფი შეაყვარა მკითხველს. სოფლის დეკანოზმა ბუთულა ჩოხელმა ყვაფი მოიშინაურა, ისე კვებავდა როგორც შინაურ ფრინველს. ცხრა წელი განუყრელად ცხოვრობდნენ ბუთულა და ყვაფი, ერთმანეთს ცხოვრებას უმსუბუქებდნენ. ადამიანი გარეული ფრინველის ან ცხოველის მოშინაურებით გარკვეულ სარგებელს პოულობს. ბუთულა იმდენად არმიწიერია, რომ მან ზარალი ნახა ყვაფის მოშინაურებით: შინაური ფრინველის გამოსაკვებ საკენკს უყრიდა ყვაფს. სამაგიეროდ ბუთულამ დიდი სულიერი სიმშვიდე მოიპოვა. ყვაფი და ადამიანი სრული ჰარმონიით ცხოვრებდნენ, გასაოცარ ერთგულებას იჩენდნენ ერთმანეთის მიმართ. ეს ჰარმონია ცხრა წლის განმავლობაში არ დარღვეულა. ბუთულასა და ყვაფის ხანგრძლივმა თანაარსებობამ გააცოფა ეშმაკი. ეშმაკმა ბუთულას მეზობელი მახარა აცდუნა. მახარას შეეძლო ყვაფი ისევე მოეშინაურებინა, როგორც ბუთულამ მოიშინაურა. ბუთულას მიერ ყვაფის მოშინაურება იყო სიკეთის გამოხატულება (ე.ი. ღმერთისათვის სათნო საქციელი), მახარას ასეთი მისწრაფება არ ჰქონდა, იგი ეშმაკის ცდუნებით მოქმედებდა. ამიტომ იყო, რომ მახარამ ადამიანისა

და ყვაფის ცხრაწლიანი თანაარსებობა დაარღვია და ბუთულას ყვაფი გადაიბირა. ეშმაკმა გაიმარჯვა.

ბუთულას რეაქცია სავსებით კანონზომიერია: სამართლიანობა მოსამართლემ უნდა ადაღინოს. დამცირებული კეთილი ადამიანის, ბუთულას, ქმედება თითქოს ისევე მისი სიკეთის გამოხატულებაა - ბუთულას მეზობლის მიმართ ძალადობა აზრადაც არ მოსვლია. თუ უფრო ღრმად ჩაუკვირდებით ბუთულას საქციელს, აქაც ეშმაკის კვალს დაინახავთ. ეშმაკმა ბუთულაც აცდუნა - მეზობელს უჩივლა. ეშმაკი კვლავ ზეიმობს. მეზობლების ერთმანეთთან საბოლოოდ დასაპირისპირებლად ახლა მოსამართლის ცდუნება იყო საჭირო. აცდუნა კიდევ. ყვაფის კუთვნილების გარკვევის ის მეთოდი, რომელიც მოსამართლემ შეარჩია, ასევე ეშმაკისგან იყო. ასე რომ, ყვაფის კუთვნილების დადგენამდე ირკვევა, რომ სამი მთავრი პირი: ბუთულა, მახარა და მოსამართლე - ეშმაკის ნებით მოქმედებდა. ყვაფი სასამართლო ექსპერიმენტს არ დაემორჩილა: არც ბუთულას ბანზე დაჯდა და არც მახარასაზე (ე.ი. ყვაფის პატრონი ვერ გაირკვა), მოსამართლის ქუდს დაასკლინტა და გაფრინდა. აბსურდი გაგრძელდა.

ზემოთ ვთქვით, რომ გოდერძი ჩოხელმა პოლიტიკური პამფლეტი აბსურდში გადაიყვანა და ამით თხრობას გასაოცარად კომიკური ხასიათი მისცა. მიუხედავად ამისა, მოთხრობა სახუმარო (გასართობ) ამბად არ იქცა. ეს იმიტომ,

რომ მწერალმა არ უღალატა ჩვეულ სტილს და აბსურდული სიუჟეტით ადამიანთან ეშმაკის დაუსრულებელ ბრძოლაზე მიანიშნა. ეშმაკისაგან ცდუნებული ადამიანები (ბუთულა, მახარა, მოსამართლე, სოფლელები) გამოსავალს ვერ პოულობენ. მოსამართლე მისი შეურაცხყოფელი ყვავის დაჭერას ითხოვს, ყვავი კი სოფელს აღარ ეკარება, გადიკარგა. შეწუხებული სოფლელები ჩიოდნენ:

- სამას წელს მაინც არ ცოცხლობდეს, საბუთი გეექნებოდა, დაბერდა და მოკვდაო.

ზემოთ ავღნიშნეთ: პოლიტიკური პამფლეტი აბსურდში გადავიდა, თუმცა უაღრესად დახვეწილი კომიზმი სასაცილო, გასართობ ამბად არ იქცა. დასასრული კი სულაც არ იყო კომიკური. აბსურდი დასრულდა. დადგა გოდერძი ჩოხელისეული დასასრულის დროც. შეწუხებული, თავმოებზრებული ადამიანებისაგან საშველი ღმერთმა მხოლოდ ბუთულას მისცა: „ბუთულას რა ენადვლება, მოკვდა სიბერით“.

ბუთულა იმიტომ კვდება, რომ მწერალს იგი ყველაზე მეტად უყვარდა, ყველაზე მეტად ებრალებოდა. ვერ დატოვებდა გოდერძი ჩოხელი მართალ ბუთულას ცოდვილთა შორის.

26 მაისი, 2010 წელი

## სიკვდილისა და ბოროტების სამანი

ცოდვილია ადამიანი. ცოდვა-მადლი სიკვდილის შემდეგ დაიდება სასწორზე და უფალიც თავის მსჯავრს გამოიტანს: ან სასუფეველი და სამუდამო ნეტარება, ან ჯოჯოხეთი და სამუდამო სატანჯველი. იცის ადამიანმა ეს. იცის, მაგრამ მაინც ეჭვი ეპარება: ვაითუ არც სასუფეველია და არც ჯოჯოხეთი? იქნებ ყველაფერი ამ ქვეყნად მთავრდება? ღრღნის ეს ეჭვი ადამიანს. თუ ეშმაკმა იმძლავრა და ადამიანს გონება დაუბნელა, მაშინ რა ეშველება მზისქვეშეთს? რა ეშველებათ ადამიანებს? როგორ უნდა იცხოვრონ ერთად უფლის მცნებათა მიმდევარმა და მისმა უარყოფელმა? - დაფიქრდა ყოველივე ამაზე გუდამაყრელი შუღლა, დაფიქრდა და შეეშინდა. ბრძენი კაცი იყო შუღლა ჩოხელი. იმთავითვე მიხვდა, რომ ცოდვიანი ცხოვრების მოსურნეთ უფლის სიტყვის ჭეშმარიტებაში ვერ დაარწმუნებდა. ეცოდებოდა შუღლას ჩოხის წმინდა გიორგის ერთგული ყმანი, უფლის ნებას მინდობილნი. ეცოდებოდა სოფელი ჩოხი, მაღალი მთის წვერზე დაბუდებული მზე რომ დაჰყურებდა „ჩაჭრილაის მთიდან“. იფიქრა შუღლამ, ბევრი იფიქრა და გამოსავალიც იპოვა. ღმერთმა საიქიო ხომ ორად

გაყო - სასუფეველად და ჯოჯოხეთად - ჰოდა, შუღლამაც გადაწყვიტა, სააქაოც, სოფელი ჩოხიც, ორად გაეყო. თემის თავკაცმა სოფლელებს განუცხადა: „ის დიდი ლოდი იყოს სიკეთისა და ბოროტების საზღვარი“. ძალზე უბრალოდ განუმარტა შუღლამ სიკეთე და ბოროტება ადამიანებს:

- „ვინც დღეის მერე სიკეთეს ემსახურება, ის წმინდა გიორგის ემსახურება და მან უნდა იცხოვროს ლოდს აქეთ, წმინდა გიორგის ადგილში. აქვე უნდა დაიმარხოს სიკვდილის მერე“.

- „ვინც ან კაცს მოკლავს, ან იმრუშებს, ან სხვა რაიმე მიუტყეველ დანაშაულს ჩაიდენს, ის ბოროტ სულის ემსახურება და მას უფლება არ აქვს წმინდა ადგილში იცხოვროს. ასეთი კაცი უნდა მოვიკეთოთ და დავასახლოთ ლოდის იქით, დევის სამკვიდრებელში. სამარხიც იქ უნდა ჰქონდეს“.

შუღლა კმაყოფილი უნდა ყოფილიყო: „მღუმარებამ დაისადგურა სამანს იქით. ღამე ერიდებოდნენ იმ ადგილებში სიარულს, ავი სუფლებსა ეწინოდათ“. არავის არ სურდა სამანს იქით დასახლება.

გაცოფდა ეშმაკი. გონება დაუბნელა მაშენიას... და სამანს იქით პირველი მოსახლე გაჩნდა, მერე მეორეც დასახლდა, მესამეც... იმატა ცოდვილთა რიცხვმა.

მძიმე ტვირთი აიკიდა შუღლამ. არც ისე ადვილი აღმოჩნდა ცოდვა-მადლის განკითხვა, იმისი გარკვევა, თუ

ვინ უნდა დამარხულიყო სამანს იქით ან აქეთ. ბბერაის სიკეთეც ბებერი ჰქონდა ჩადენილი და ბოროტებაც. სამანს იქით უნდა გათხრილიყო მისი საფლავი თუ სამანს აქეთ? ეს კი აღარ იცოდა შუღლამ. თემმა ასეთი მსჯავრი გამოიტანა: ბერა ისე დამარხეს, რომ „ნახევარი მხარ-გვერდი სამანს აქეთ ჰქონდა, ნახევარი - სამანს იქით“.

ამით არ დამთავრებულა შუღლას საფიქრალი. შუღლას ბრძანებით სამანს იქით დასახლებულმა გულქანმა თავი ჩამოიხრჩო. ცოდვას კიდევ უფრო დიდი ცოდვა მიემატა. რა უნდა ეღონა შუღლას? „სამანს იქით არ სჭრიდა მისი ძალა“. დაეჭვდა შუღლა: იქნებ არც ღირდა გულქანის სამანს იქით დასახლება? იქნებ საერთოდ არ ღირდა სამანის დადება? სინანული გვიანი იყო. სამანს იქით დასახლებულმა გულქანს ასეთი განაჩენი გამოუტანეს: - „თავისმკვლეელი თავისი ნებით ჰკლავს ღმერთის დიდ ნებას, მასში ჩასახლებულ სიცოცხლეს. ამიტომ ის არც ჯოჯოხეთის ღირსია და იმ ქვეყანაზე, ის ჯოჯოხეთზე ქვემოთ უნდა იტანჯებოდეს!“

მიხვდა შუღლა, რომ ძალზე ძნელი ყოფილა ადამიანთა ცოდვა-მადლის განკითხვა. ადამიანებს შორის ვეღარ გაძლო. „თადეოხი აირჩია შუღლამ თემის თავად. თვითონ გუდა-ნაბადი აიკრა და იმ მთის წვერზე დასახლდა, საიდანაც მზე ამოდის“.

დარწმუნდა ბრძენი გუდამაყრელი: ადამიანთა ცოდვა-მადლი მხოლოდ ღმერთმა უნდა განკითხოს.

- სწორად მიგიხვედი სათქმელს, გოდერძი?
- აბა, რაეი!
- ესე იგი არ მოგწონს ჩემი ნათქვამი?
- არა, მე ეგ არ მითქვამს!
- არ ჰქონდა შუღლას ადამიანთა ცოდვა-მადლის

განკითხვის უფლება!

- შენც არ გაქვს შუღლას განკითხვის უფლება!
- მაშ, რისი უფლება მაქვს?
- აირჩიო სამანს აქეთ გინდა დასახლება თუ იქით!
- შენ, ცხადია, სამანს აქეთ დასახლდებოდი!
- არა!
- მაშ, სად?

მე ჩადისავეთ მაგრად ჩავეკვრებოდი გორდაგორ დაგორებულ მთვარეს და ატატებული ლანდივით გამოვჩნდებოდი სამანის ორივე მხრიდან!

- ესე იგი ცოდვილ დედამიწას განერიდებოდი?
- ჰო.
- არ მოგენატრებოდი?
- მომენატრებოდი!
- სამანს აქეთ თუ სამანს იქით დასახლდებულეები?
- ორივენი.
- მაშ, რისთვისდა დასდე სამანი?

- სამანი მე არ დამიღია, სამანი ღმერთმა დასდო.
- მაშ, რისთვისდა დაწვერე ეს მოთხრობა?
- ადამიანებს ღმერთის მიერ დადებული სამანი

შევახსენე!

7 ივნისი, 2010 წელი

## ვერ ღარჩებოლა მაქსინაი დეღამიწახე

ცხვარ-ბატკანი ადამიანისათვის არსებობის, სიცოცხლის შენარჩუნების ერთ-ერთი წყაროა. ცხვარ-ბატკანი არწივისთვისაც სიცოცხლის წყაროა. არწივთან შედარებით ადამიანს უპირატესობა აქვს, იგი ფლობს ფარას და ნება-ნება იკვებება კიდევ ცხვრისა და ბატკნის ხორციით. არწივმა ცხვარ-ბატკანი ადამიანს უნდა მოსტაცოს, რაც, ცხადია, არც ადვილია და არც თუ უხიფათო. ასეა ეს მას შემდეგ, რაც დედამიწაზე გაჩნდნენ ადამიანი, არწივი და ცხვარი. ეს ბრძოლა, ბრძოლა არსებობისათვის, დღემდე გრძელდება.

გოდერძი ჩოხელი გვარწმუნებს, რომ ის, რაც ჩვეულებრივი ადამიანისათვის ბრძოლაა, სინამდვილეში, უფლის ნებით დაშვებული ჰარმონიაა. ამ ჰარმონიის დანახვა ცოტა ძნელია, თუმცა თუ გოდერძი ჩოხელის მოთხრობა „არწივთან ფრენას“ გულდასმით წაიკითხავ, დარწმუნდები: ადამიანი, არწივი და ცხვარი ერთი მთლიანის განუყოფელი ნაწილები არიან, მათი არსებობის წესია ერთ მთლიანსა და განუყოფელში არსებობა.

გუდამაყრელებმა, კოტორაანთ მამუკაის ბრიგადის მწყემსებმა, ლაზარაანთ მაქსინაიმ და გაგიმ ყოველივე ზემოთ თქმული არ იცინან. თოვლიანი საჯიხვეებიდან მოფრენილმა ერთმა არწივმა „წელს უკვე მესამე ცხვარ-ბატკანი მოსტაცა მაქსინაის“. მმიუხედავად ამისა, „ხანდახან, როცა არწივები დაიგვიანებენ, მოწყენილი არიან მწყემსები, ვერაფრით ერთობიან ამ უკაცრიელ მიდამოში“. გოდერძი ჩოხელისათვის ჰარმონიულ თანაცხოვრებას არღვევს არა არწივის მოფრენა და ცხვრის მოტაცება, არამედ არწივების დაგვიანება: „მეზუთე დღეა, აღარ გაუგონია მაქსინაის არწივის ყეფა“.

ადამიანის, არწივისა და ცხვრის ჰარმონიული თანაარსებობა უფლისაგან არის და მის ცენტრში, ისევე როგორც სამყაროს ცენტრში, ადამიანია. ადამიანთა მოდემის მტერი - ეშმაკი - ამას ვერ ეგუება, ცდილობს ჰარმონიული თანაცხოვრება დაარღვიოს. ეშმაკი ადამიანის ცდუნებას იწყებს. მაქსინაი წყლის დასაღვეად წყაროსთან დაფრენილი არწივის მოკვლას ცდილობს. მწყემსი არწივს ჯოხს დაარტყამს და ორივე ხელს შემოხვევს, რომ არსად გაექცეს. არწივმა გაიბრძოლა და მაქსინაის ორივე ხელის მტევანში კლანჭები გაუყარა, ცაში აიტაცა და კლდის თავზე, ბუდეში მიიტანა. მაქსინაის არანაირი წინააღმდეგობის გაწევა არ შეეძლო, ორივე ხელის მტევანში არწივის კლანჭები ჰქონდა გაყრილი.

დაიწყო ადამიანისა და არწივის ისეთი ურთიერთობა, რომელიც მხოლოდ გოდერძი ჩოხელს შეეძლო წარმოედგინა. მაქსინაის ჭრილობები მოუშუშდა, არწივის კლანჭები ხელის მტევნებს შეეხორცა. თუ აქმდე მაქსინაის ეწადა არწივის კლანჭებისაგან განთავისუფლება და არწივი არ უშვებდა, ამიერიდან თვით არწივსაც აღარ ძალუძდა ადამიანის ხელის მტევნებიდან კლანჭების ამოღება. ადამიანი და არწივი ერთარსებად იქცნენ.

მაქსინაი დედამა არწივმა გაიტაცა. სიუჟეტის განვითარებაში პირველი მოულოდნელობა ისაა, რომ დედამა არწივმა, რომელიც კვერცხებზე იჯდა და მართვეების გამოჩეკამდე საკვებით უზრუნველყოფა ესაჭიროებოდა, მაქსინაი არ მოკლა და ამდენად, ადამიანის ხორციით კვებაზე უარი თქვა. დედამა არწივმა არც მამალ არწივს მოაკვლევინა მაქსინაი. მამალი არწივის წინააღმდეგობის მიუხედავად, დედალი არწივი მამალი არწივის მიერ მოპოვებული საკვებით (კურდღელი, ცხვარი) კვებას მაქსინაის. ადამიანს ვერ აუხსნია, რატომ იქცევა ასე არწივი.

სიუჟეტი კვლავ მოულოდნელ განვითარებას იძენს. მამალი არწივი სამი დღე არ მოფრენილა, დედალი არწივი და მაქსინაი სამი დღე შიმშილობდნენ. ადამიანი ფიქრობს, რომ არწივი შიმშილით სიკვდილს, თავისი თავის და შთამომავლობის დაღუპვას მაქსინაის შეჭმას ამჯობინებდა. არწივმა შიმშილს გაუძლო, ადამიანი არ გაიმეტა. მომდევნო

დღეებშიც არწივები თავის ლუკმას უყოფდნენ მაქსინაის. მორიგ შიმშილს მაქსინაიმ ვეღარ გაუძლო და არწივის უბეში შეფარებულმა ბუდეში ჩადებული კვერცხებიდან ერთი შეჭამა. დედალი არწივი მიხვდა, რომ მაქსინაიმ კვერცხი შეჭამა, მაგრამ მანც არ გაიმეტა სასიკვდილოდ.

სიუჟეტი ისე ვითარდება, რომ არწივის მიერ მაქსინაის შეჭმა თითქოს ბუნებრივი უნდა იყოს: თუ შიმშილით შეწუხებულმა ადამიანმა შეჭამა არწივის კვერცხი და სიცოცხლე მოუსწრაფა ჯერ არგამოჩეკილ მართვეს, რატომ არ უნდა შეეჭამა დედალ არწივს ადამიანი, ის ხომ ამით თავსაც გადაირჩენდა და შთამომავლობასაც. გოდერძი ჩოხელი ამ ლოგიკას არ აღიარებს. წარმოუდგენელი რამ ხდება: დედალი არწივი მაშინაც კი არ კლავს ადამიანს, როცა დაჭრილი მამალი არწივი მოკვდება და დედალ არწივს და ახლად გამოჩეკილ მართვეებს შიმშილით სიკვდილი დაემუქრებათ.

არწივებმა ადამიანი შესაჭმელად ვერ გაიმეტეს. მაქსინაი არც კი დაფიქრებულა, არ უცდია აუხსნა არწივების საქციელი. მაქსინაის არსებაში გარდატეხა იმ წუთიდან დაიწყო, როცა მამალი არწივის სიკვდილს უყურა. არწივის სიკვდილის სცენა იმდენად შემზარავი, გამაოგნებელი იყო, რომ მაქსინაის სულში გარდატეხა სრულებით ბუნებრივად მოხდა. დაჭრილმა მამალმა არწივმა შეძლო უკანასკნელი ნადავლი, ბატკანი ბუდემდე მიიტანა:

„ჰაერში მამალი არწივი გამოჩნდა, ბატკანი მოეტანა და, კი არ დაჯდა, დაეხეთქა კლდეს...

მამალს თქრიალით ჩამოსდიოდა სისხლი ფერდიდან. დედალი გაშტერებული უყურებდა.

მამალი ფეხზე იდგა და ისე კვდებოდა. თვალებით აჭყვივლებულ შვილებს უმზერდა და კვდებოდა ნელ-ნელა, სისხლის ჩხრიალით. მერე დედალ არწივს შეხედა, მერე მაქსინაის გაუყარა მზერა და ჩახლჩილი ხმით დაიყვია...

არწივმა მზეს შეხედა და ნება-ნება მოეშვა, დაიყვია და ჩამოუყარდა თავი“.

გასაგებია რატომ უმზერდა არწივი აჭყვივლებულ შვილებს. ამ მზერაში იქნებოდა სიყვარულიც, აღერსიც, სიამაყეც, იმედიც და სინანულიც. რატომ გაუყარა მზერა მომაკვდავმა არწივმა მაქსინაის? ხომ არ ინანა, რომ არ მოკლა ადამიანი, რომელმაც დედალ არწივს კვერცხი მოჰპარა და შეჭამა, ესე იგი თავისუფლად შეეძლო შეეჭამა მართვეებიც; ის ადამიანი, რომლის ჯილაგისაგან ერთ-ერთმა მას თოფი ესროლა და სიცოცხლე მოუსწრაფა. ეს საიდუმლო თან წაიღო არწივმა და გოდერძი ჩოხელმა...

ლამაზად მოკვდა მამალი არწივი. ასეთი სიკვდილი ყველას არ ძალუძს: „მაქსინაიმ თავი დახარა“, თავი დახარა არწივის ვაჟკაცური სიკვდილის დამფასებელმა ადამიანმა. იქნებ იფიქრა კიდევაც მაქსინაიმ: შეეძლო თავად ასეთი ერთგულება, ასეთი სიკვდილი?

სიუჟეტი ისე ვითარდება, რომ თითქოს გარდაუვალი უნდა ყოფილიყო მაქსინაის სიკვდილი: დედალმა არწივმა მართვეები ადამიანის ხორციით უნდა გამოკვებოს, სხვა გზა მას არ დარჩენია. ასეთი დასასრული ლოგიკური იქნებოდა, მაგრამ არა გოდერძი ჩოხელისეული. ჯერ დასასრული ნაადრევია. გოდერძი ჩოხელი ახლა შედის თავის სტიქიაში, ახლა უნდა თქვას თავისი სათქმელი. თქვას ის, რისთვისაც დაწერა „არწივთან ფრენა“.

ლოგიკის საწინააღმდეგოდ, მაგრამ არა გოდერძი ჩოხელისეული ლოგიკისა, დედალი არწივი არ შეჭამს ადამიანს, არ შეჭამს პრაქტიკულად უკვე მისი სხეულის ნაწილს და მართვეებისათვის საკვების მოპოვების მიზნით ცხვირის ფარისაკენ გაფრინდება. ცხადია, არწივი თან წაიღებს მაქსინაისაც, რომლის ხელის მტევნებშიც ჩახორცებულია არწივის კლანჭები. შია მაქსინაის, შია არწივს, შიათ ბუდეში მყოფ რამდენიმე დღის წინ დაჩეკილ მართვეებს. არწივი ფარისაკენ კი გაფრინდა, მაგრამ მას ბატკნის მოტაცება აღარ შეუძლია, რადგან კლანჭები მაქსინაის ხელის მტევნებში აქვს გაყრილი და ჩახორცებული. ბატკანს ფეხს მაქსინაი შემოახვევს და არწივი და ადამიანი ბუდისაკენ გაფრინდებიან.

გადარჩა ადამიანი, გადარჩა არწივი, გადარჩნენ მართვეებიც.



მაქსინაი ადამიანია და დედამიწაზე ადამიანურად ცხოვრება სწავლია. მშობრე დღეს, როცა არწივი წყაროსთან დაფრინდა მაქსინაიმ იქვე წინასწარ მწყემსების მიერ მისთვის დატოვებული დანა აიღო, არწივს ერთი ფეხი მოაჭრა და ცალი ხელი გაითავისუფლა. არწივი მაინც აფრინდა. მშობრე ფეხი მაქსინაიმ არწივს უკვე ჰაერში მოაჭრა, მეორე ხელიც გაითავისუფლა და მიწაზე დაეცა.

სიუჟეტი თითქოს აქ უნდა დასრულებულიყო: ადამიანი დაბრუნდა დედამიწაზე. დედა უკვე მერამდენედ სიუჟეტი ახალ და მოულოდნელ განვითარებას იძენს:

„უფეხოდ ხომ ვეღარ ინალირებს, – გაიფიქრა მაქსინაიმ და წარმოიდგინა სამი დედისაკენ კისერწაწვდილი ყელტიტველი მართვე“.

მაქსინაის გულში აღძრული სინანული ბუნებრივია, მაგრამ გოდერძი ჩოხელს ბუნებრივი დასასრული სულაც არ ხიბლავდა.

დასასრული სრულიად მოულოდნელი აღმოჩნდა. გოდერძი ჩოხელმა კიდევ ერთხელ აქცია ალოგიკური ლოგიკურად. მმიწაზე დაშვებულ ფეხებმოჭრილ არწივს მწყემსები მოსაკლავად უახლოვდებიან. არწივი მათ ვერ ხედავს.

„მაქსინაიმ არწივს აუქშია.

არწივმა კაცები დაინახა და ფრთები აიქნია.

ვერაფრით ვეღარ აიწია ჰაერში. მაშინ მაქსინაი ფეხზე წამოდგა და კაცებისაკენ კი არ წავიდა, პირიქით, გაექცა მათ..”

საით გაიქცა მაქსინაი? რამდენიმე დღე ის ხომ ადამიანებთან დაბრუნებას ლამობდა და ამისათვის ორივე ფეხი მოაჭრა არწივს. რატომ გაურბის ადამიანებს მაქსინაი?

„არწივი ფრთებს აქნევდა და აფრენასაც ცდილობდა. მმაქსინაი ეხმარებოდა, კაცები უკან მისდევდნენ.

კლდის პირზე არწივმა მოახერხა ჰაერში აფრენა. მაქსინაიმ ახლა უფრო შეიკვცა ფეხები.

არწივმა წრე მოხაზა“.

– გოდერძი! რატომ გაჰყვა მაქსინაი არწივს?

– სხვაგვარად არ იქნებოდა!

– მაქსინაი რომ არწივს აფრენაში დახმარებოდა, მაგრამ თვითონ დედამიწაზე დარჩენილიყო?

– მაშინ არწივიცა და მართვეებიც დაიღუპებოდნენ.

– ესე იგი მაქსინაი არწივისა და მართვეების გადარჩენის მიზნით გაჰყა არწივს?

– იყო კიდევ სხვა, უფრო დიდი, მიზეზი.

– რა მიზეზი?

– ვალი ჰქონდა მაქსინაის გადასახდელი.

– დედალი არწივის ვალი?

– კიდევ უფრო დიდი ვალი.

– მართვეების ვალი?

- კიდევ უფრო დიდი ვალი.
- ვის წინაშე? რა ვალი?
- მომაკვდავი არწივის ვალი!
- მე გოდერძი ჩოხელი არა ვარ და ცოტა მიჭირს ეგეთი რაიმეს გაგება. მითხარი, რისთვის დაწერე ეს მოთხრობა?
- ადამიანმა, არწივმა და ცხვარმა იმ წესით უნდა იარსებონ დედამიწაზე რა წესიც ოდითგანვე დაუდგინა ღმერთმა. ვინც ამ წესს დაარღვევს, ის ვალშია და უნდა მოიხადოს ვალი!

12 ივნისი, 2010 წელი

## ცოდვილის სიკვდილი

„ადამიანდ ყოფნის“ „ადამიანად არყოფნაში“ გადასვლა, კავშირი ამ ქვეყნიურსა და იმ ქვეყნიურს შორის გოდერძი ჩოხელის მუდმივი საფიქრალი იყო. ერთხელ ალბერტ აინშტაინს ჰკითხეს: სიკვდილის გეშინიათ? პასუხი: მეშინია... ისე კი საინტერესო უნდა იყოს... სიკვდილის საიდუმლო აინტერესებდა გოდერძი ჩოხელსაც, საერთოდ სიკვდილის და კერძოდ ცოდვილის სიკვდილის საიდუმლო. ამ თვალსაზრისით შედეგურებად უნდა მივიჩნიოთ „სამანს იქით დასახლებულნი“ და „მღვდლის ცოდვა“, გასაკუთრებით კი, - „მღვდლის ცოდვა“.

ცოდვილი იყო ბერაი ჩოხელი, „შვიდ ოცი“ კაცი ჰყავდა მოკლული. ბერაის ადამიანი შეიძლება საერთოდ არ მოეკლა, ქისტებს რომ მისი სოფლის ჯოგი არ გაეტაცათ და შიმშილით სიკვდილისათვის არ გაეწირათ დიდი და პატარა. ხუთი წელი ხოცავდა ბერაი ქისტებს, ხუთი წელი იცავდა თავის სოფელს. გოდერძი ჩოხელი მისთვის დამახასიათებელი ოსტატობით გვარწმუნებს: არ იყო ბერაი მკვლელი. ამიტომ იყო, რომ როგორც კი ქისტებმა მშვიდობის სანაცვლოდ ხარკი იკისრეს, ბერაი უყოყმანოდ დათანხმდა.

დამშვიდდა „შიდ ოცი“ ქისტის მომკვლელი გუდამაყრელი. გოდერძი ჩოხელი თითქოს შეუმჩნევლად ბერაის მიმართ სიმპათიით იმსჯელებდა. შემთხვევით არაა, რომ ქისტებთან მშვიდობის ჩამოვარდნის პირველ დღესვე „ბერაი კერასთან იჯდა და სანთელს ახვევდა“. აშკარაა, რომ მწერალი მიგვანიშნებს ბერაის სულში მომხდარ დიდ გარდატეხაზე. ბერაი ცოდვებს ინანიებდა. წინააღმდეგ შემთხვევაში, ქისტების დამშინებელი და დამხარკველი გუდამაყრელი ხატის გორაზე დადგებოდა და გამარჯვებული იერით გაჰხედავდა მისთვის ხარკის მოსართმევად მისულ ქისტებს. ბერაი ასე არ მოიქცა იმიტომ, რომ მას, ქისტებზე გამარჯვების მიუხედავად, საზეიმო განწყობილება სულაც არ ჰქონდა. „შიდ ოცი“ ქისტის მკვლელი სულზე და იმ ქვეყნიურ ცხოვრებაზე ფიქრობდა. მწერალმა იმაზეც მიგვანიშნა, რომ ბერაის სიკვდილისათვის მზად იყო, მზად იყო უდრტვინველად მიეღო სასჯელი.

ბერაი ჩოხელი ძმამ მოკლა ღალატით. ძმისაგან ღალატს ელოდა ბერაი: „იცოდა, რომ შურდა ძმას მისი სახელი და ახლა მაინცაღამაინც არ გაჰკვირვებია იმისი მტრობა“. ქისტების დამწიოკებელი ადრე თუ გვიან ელოდა სასჯელს, სასჯელს დიდი ცოდვებისათვის. ბერაი თავს ცოდვილად მიიჩნევდა. ამიტომ იყო, რომ „სამანს იქით“, ცოდვილთა გვერდით, ითხოვა დაკრძალვა:

„- სამანს იქით დამმარხეთ, შუღლაჲ.

- რატომ?
- ცოდვა მაქვს ჩადენილი.
- რამდენი ქისტი მოკალ?
- შიდ ოცი.
- მტრის მოკვლა ცოდვად არ გეთვლება.
- ვიცი.
- მაშ რა ცოდვა გაქვს?
- იმ შიდ ოციდან სამი სული მაწევს ცოდვად“.

ორი ქისტის, ნეფისა და დედოფლის, ქორწილის დროს მოკვლა, ისევ ქისტეთში ჩვილი ბავშვის მოკვლა - აი რა ცოდვები აწუხებდა სასიკვდილოდ დაჭრილ ბერაის. განსაკუთრებით ჩვილი ბავშვის მოკვლა ტანჯავდა მას: „მესამე ცოდვა ამ ორზე უფრო მძიმეა“.

ღამაზად მოკვდა ბერაი ჩოხელი. ძმისაგან ნატყორცნი ისარი დამსახურებულ სასჯელად მიიღო, ცოდვები აღიარა, ჩადენილ ცოდვათაგან ყველაზე მძიმეც გამოყო და ღმერთის მსჯავრის მომლოდინე გავიდა ამ სოფლიდან.

ცოდვილი იყო შიო მღვდელი, წითელი მღვდელი. შემთხვევითი არაა რომ გოდერძი ჩოხელი შიო მღვდელის მიერ ცოდვიანი ცხოვრების დაწყებას საბჭოთა რეჟიმს არ უკავშირებს. შიოს უამრავი ცოდვა ჯერ კიდევ მანამდე ჰქონდა ჩადენილი. სულ ერთი წინადადებით მიგვანიშნებს მწერალი: „ღმერთთან კარგა ხანია შემომწყრალი იყო“. საბჭოთა რეჟიმმა ახალი ასპარეზი მისცა ღმერთთან

„შემომწყრალ“ მღვდელს: „როცა შიო მღვდელმა, ახალი ცხოვრების დადგომასთან ერთად, შავი ანაფორა გაიხადა და მის ნაცვლად წითელი სატინის გულისჯიბებიან ხალხათში გამოეწყო, იმ დღიდან შეარქვა ხალხმა წითელი მღვდელი“. ანაფორის გახდა იმხანად არ ითვლებოდა არაჩვეულებრივ მოვლენად. ბევრი მღვდელი სიკვდილის მუქართ აიძულეს გაეხადა ანაფორა. მწერალი არსად ამბობს, რომ შიო აიძულეს, შიომ ანაფორა თავისი ნებით გაიხადა სრულიად კონკრეტული მიზნით: „ახლად ჩამოყალიბებულ კოლმეურნეობასაც ამავე ხალხათში გამოწყობილი ჩაუდგა სათავეში. ხალხის თავკაცობა და თავმჯდომარეობა ძალიან შეიფერა“. წითელი მღვდელი აქ არ შეჩერებულა, კიდევ უფრო დიდი ცოდვა ჩაიდინა. შიომ ასე მიმართა ხალხს: „ჩვენ იქიდან უნდა დავიწყოთ ჩვენი ნამდვილი ცხოვრება სადაც თვითონ ღმერთმა დაასრულა და ამით საბოლოოდ დაამტკიცა თავისი არარსებობა, – მიმართა კოლმეურნეობის კრებაზე შიომ ხალხს და ახალი ცხოვრება იმით დაიწყო, რომ საუკუნეების მანძილზე წმინდა ადგილად მიჩნეულ ხატის მოედანზე ხალხს ქვა მიატანინა და ეკლესიის მოპირდაპირე მხარეს ბოსელი ააშენებინა“. – ცოდვით დაცემული სხეებსაც ცოდვისაკენ ეზიდებოდა.

შიო საბჭოთა რეჟიმის წარმომადგენლებს არ დაუშინებიათ, არც ვინმეს უბიძგებია ამ უდიდესი ცოდვის

ჩადენისაკენ. შიომ ეს გზა თავად აირჩია – ეშმაკის მსახურად თავის ნებით იქცა.

ბერაი ჩოხელიც ცოდვილია და შიო მღვდელიც ცოდვილია. ბერაიმ ჩვილი ბავშვი მოკლა, საქორწინო სუფრაზე მოკლა ნეფე დედოფალი. შიოს ამგვარი ცოდვა არ ჩაუდენია. მიუხედავად ამისა გოდერძი ჩოხელი გვარწმუნებს: ბერაი ღმერთს არ განდგომია და ცოდვებიც მუდამ აწუხებდა; შიო მღვდელი ღმერთს განუდგა და ამიტომ ჩადენილი ცოდვების გამო სინდისის ქენჯნა არასდროს უგვრძენია.

ბერაი ჩოხელმა ბევრი მოძალადე, მძარცველი და მისი სამშობლოს დამაქცევარი ქისტი საკუთარი ხელით დახოცა, ერთ ჩვილსა და ნეფე დედოფალსაც საკუთარი ხელით მოუსწრაფა სიცოცხლე. შიომ უამრავი ადამიანი გააუბედურა. მის გულებოროტებას საზღვარი არ უჩანდა. ათეული წლების განმავლობაში ათასგვარი მზაკერული ხერხით უშხამავდა ადამიანებს სიცოცხლეს, ბევრი მათგანი შეეწირა მის შურსა და ბოლმას. ბერაიმ ათი მცნებიდან მხოლოდ მეექვსე მცნება („არა კაც-ჰკლა“) დაარღვია და იმასაც მწარედ განიცდიდა. შიო მღვდელმა ღმერთი უარყო, დაარღვია მეექვსე მცნება („არა კაც-ჰკლა“), მეშვიდე მცნება („არა იმრუშო“), მერვე მცნება („არა იპარო“), მეცხრე მცნება („არა ცილი-სწამო...“), მეათე მცნება („არა გული გითქვამდეს ცოლისათვის მოყვასისა შენისა... არცა ყოვლისა მისთვის, რაიცა იყოს მოყვასისა შენისა“) და მიუხედავად ამისა ერთხელაც არ

მოუნანიებია, პირიქით ცოდვას ცოდვას უმატებდა. ბებრაი ცოდვიანი ცხოვრების შემდეგ დამშვიდდა: „კერასთან იჯდა და სანთელს ახვევდა“. შიომ სისხლის წყურვილი ვერ მოიკლა, ადამიანების გაუბედურება მოთხოვნილებად ექცა.

შიოს აგაკობისა და გულებოროტების აღკვეთა მხოლოდ ღმერთმა შეძლო. სასჯელი საშინელი იყო. შიოს ეჩვენებოდა, რომ ყვავი კი არ ჩხაოდა, არამედ ჩხაეილის ნაცვლად შიოს მიერ სხვდასხვა დროს გაუბედურებული ადამიანების სახელს იძახდა. რამდენიმე დღეში ყვავმა უამრავი დაღუპულის სახელი შეახსენა შიოს. ბერაისაგან განსხვავებით შიოს მონანიების სურვილი არც ამჯერად გასჩენია, პირიქით გაბოროტდა და მისი მამხილებელი ყვავის დასჯა გადაწყვიტა. შიოს მიერ მოგონილი სასჯელი საშინელი იყო. მას შეეძლო ყვავი თოფით მოეკლა, მაგრამ ასე არ მოიქცა. შიომ ყვავის არყოფნის დროს ბუდიდან კვერცხები ამოიღო, მოხარშა და ისევ ბუდეში ჩააწყო. ცხადია, ყვავი ამას ვერ მიხვდა და მშვიდად ელოდებოდა როდის გამოიჩეკებოდნენ ბახალები. შიო ტკბებოდა მოტყუებული ყვავის ცქერით. ბუდეში დიდ ხანს ჯდომით ყვავი ისე დასუსტდა რომ საკვების მოპოვების თავიც არ ჰქონდა, წყლის დასალევადაც ვეღარ მიფრინავდა. ბოლოს ყვავი წყურვილისაგან და შიმშილისაგან სიკვდილის პირას მივიდა. კმაყოფილმა შიომ იმ ხის მოჭრა დაიწყო, რომელზეც ყვავს ბუდე ჰქონდა. გაბოროტებულს ყვავის თავისი ხელით მოკვლა სურდა, თუმცა იცოდა, რომ ყვავი

ისეც მოკვდებოდა. ააქ კი ღმერთმა შიოს ბოროტებას ზღვარი დაუდო. მოჭრილი ხე შიოს დაეცა. ყველაზე ადრე მისი სიცოცხლე შეიწირა...

ლამაზად მოკვდა ბერაი: თავის ცოდვებზე დაფიქრებული, მტერთან შერიგებული, მონანული, ღმერთის მსჯავრს მინდობილი. საზიზღრად მოკვდა შიო: ღმერთის უარყოფელი, ყველაზე და ყველაფერზე გაბოროტებული, მოყვასის წინააღმდეგ დაუცხრომლად მებრძოლი, ყვავთან ბრძოლაში დამარცხებული.

რას განიცდიდა სიცოცხლისა და სიკვდილის მიჯნაზე მდგარი ბერაი ჩოხელი, რას ფიქრობდა, რას ნატრულობდა, მწერალს არ უთქვამს. სამაგიეროდ გოდერძი ჩოხელმა დახატა ამ ქვეყნიდან შიოს გასვლის სულისშემძვრელი სურათი. ცოდვილის სიკვდილი ისეა აღწერილი, რომ თითქოს ხილვა იყოს, ხილვა ცხადი და სრულიად ნათელი. ყველაფერი ისე დამაჯერებელია, რომ ზოგჯერ ვეღარ არჩევ: ტექსტს კითხულობ, ნახატს უყურებ თუ ფილმს.

მის მიერვე ყვავის მოკვლის მიზნით მოჭრილი ხის ქვეშ მოყოლილი, სასიკვდილოდ განწირული შიო გონს რომ მოვიდა, რაც დაინახა „ჩასასვლელად გამზადებული წითელი მზე“ იყო. „თეითონაც თვალეში სისხლი მოსწოლოდა და ყველაფერს წითლად ხედავდა“. შემდეგ დაიწყო საშინელი ტანჯვა:

„სოფლიდან მტრედები ამოფრინდნენ და მსუბუქად აიჭრნენ ცაში.

შიოს რატომღაც მოეჩვენა, რომ ეს მტრედები იმათი სულები იყო, ვინც კი ოდესმე მისი მიზეზით გამოესაღმა ამ წუთისოფელს“.

შიო ალბათ ვერასდროს წარმოიდგენდა, რომ ასეთი შემზარავი სიკვდილი ერგებოდა: „საზარელ სიმარტოვეს გრძნობდა სიკვდილის წინ. უნდოდა ვინმესთვის გადაეშალა გული, უნდოდა აღსარება ეთქვა, მაგრამ ახლომახლო კაციშვილი არ ჩანდა“.

საშინელი აღსასრული კი ასე დადგა:

„შიომ სისხლისფერ ცას შეხედა და შეძრწუნდა: ციდან სისხლის წვიმა წამოვიდა.“

ეს იყო ყველაზე საშინელი განცდა მის ცხოვრებაში.

სასოწარკვეთილს ისევ ყვირილი მოუნდა.

ამჟამად მქისე ხრიალი აღმოხდა.

ეს არ იყო ყვირილი, არც რაიმე სხვა გრძნობის გამომხატველი ხმა.

ეს სულის ამოსვლა იყო.

ასე შორდება ცოდვილი სული შეჩვეულ სხეულს: მძიმედ, წვალებით და შემაზრზენი მქისე ხმურით“.

ებრალება გოდერძი ჩოხელს მონანული ცოდვილი ბერაი. არ ებრალება ღმერთის მგმობელი, წითელი მღვდელი შიო. თითქოს სიუჟეტი ლოგიკურ დასასრულამდე მივიდა. მოულოდნელად სიუჟეტი ახალ განვითარებას იძენს. შიოს კუბოში იმ ანაფორით ჩააწვეწვენ, რომელიც მან თავის ნებით

გაიხადა დიდი ხნის წინ.ეეს ანაფორა შიოს სკიერში ჰქონდა გადამალული და მხოლოდ ერთხელ მოუნდა მისი ნახვა.

შიოს მიერ ანაფორის შენახვა და შემდეგ კუბოში მიცვალებულის ანაფორით შემოსვა არ შეიძლება შემთხვევითი იყოს. შემთხვევით გოდერძი ჩოხელი ერთ სიტყვასაც არ წერდა. ხალხს რომ შიო კუბოში წითელი სატინის ჯიბეებიანი ხალათით ეხილა ჩათვლიდნენ, რომ ასაფლავებდნენ კოლმეურნეობის თავმჯდომარეს. კუბოში ანაფორით შემოსილი შიო რომ იხილეს, ხალხმა ეს დიდი ხნის წინ დაკარგული მღვდლის დაბრუნებად აღიქვა. ამიტომ იყო, რომ „ქალები შიო მღვდელს ტიროდნენ“. თითქოს გადაავიწყდათ, რომ ანაფორით შემოსილი შიო მღვდელი და წითელი სატინის ჯიბეებიანი ხალათით შემოსილი კოლმეურნეობის თავმჯდომარე ერთი და იგივე ადამიანი იყო.

გოდერძი ჩოხელმა ცოდვილი მღვდლის განსჯა თავს არ იღო: თავის დამოკიდებულება მწერალმა შიო მღვდლის ცოლის სიტყვებით გამოხატა: „მარტო ერთი ღმერთი არის მაგისი გამკითხავი, მეტი არაფერია“.

დასასრული გოდერძი ჩოხელისებურია, განუმეორებელი და ბრწყინვალე: „დარჩა ერთ ადგილას ამოწეული მიწა, რომლისთვისაც სულ ერთია როგორი ტანსაცმლით ჩაუგორებენ უბეში ადამიანს. სული კი...“

## რატომ ტირის ბოღერძი ჩოხელი?

რატომ ტირის გოდერძი ჩოხელი? იმიტომ, რომ ცოდვიანია ეს ქვეყანა, ცოდვიანია ადამიანი, ცოდვას ცოდვა ემატება და მიძიდება მიწა. რა ჰქნას მან, ვისაც არ სურს ცოდვიანი ცხოვრება? რა უნდა ჰქნას და, მხარზე ამოსული ნაძვი რომ არ გაუხმეს, მიწაში ჩაიხარდოს და მიწად იქცეს, ან დედამიწაზე ოქროსფერი ხომალდი რომ მოფრინდება, მას გაჰყვეს ცაში. არადა, ადამიანს დედამიწაზე სურს ცხოვრება, მაგრამ ვერ ცხოვრობს. წასვლაც არ უნდა, დარჩენაც აუტანელია... ამიტომ ტირის გოდერძი ჩოხელი.

ზოგიერთებმა დარჩენას წასვლა არჩიეს და წავიდნენ კიდევ. მერე რა შეიცვალა ამით? უკეთესი გახდა ეს ქვეყანა? – არა. ცოდვა ისევ მატულობს. ისევ ცას შეჰყურებს და ისევ მიწას ჩასჩერებია ადამიანი. წავიდეს თუ დარჩეს? წასვლაც არ უნდა, დარჩენაც აუტანელია... რატომ არის ასე? – არაფერ იცის ეტყობა, მუდამ ასე იქნება. თუ ასე იქნება, მაშინ რისთვისღა ესვამთ კითხვას: რატომ ტირის გოდერძი ჩოხელი?

რატომ არის ასეთი ცოდვიანი ეს ქვეყანა? რატომ არის ასეთი საცოდავი ადამიანი? რატომ ფიქრობს მუდმივად

წასვლა-დარჩენაზე ადამიანი? ჩვენ რომ გვეგონა, ამისი პასუხი არაფერ იცისო, თურმე სცოდნია გუდამაყრულ შუღლიანთ სებას:

– აეგეთია ეს ცხოვრება!

კითხვასაც და პასუხსაც მაშინ აქვს აზრი, თუ სებას აღარ ჩავეძიებთ:

– მაინც როგორია?

თუ ეს კითხვა მაინც დასვა ვინმემ, სებას ნუ ჩააცივდება: გინდა თუ არა გამაგებინე, როგორია ეს ცხოვრებაო. სება ერთი გუდამაყრული კაცია და მეტს ვერეფერს ათქმევინებ. თუ მაინცდამაინც სურს ვინმეს, პასუხი მიიღოს, გოდერძი ჩოხელის ყველა მოთხრობა და ლექსი უნდა წაიკითხოს. თუ ღმერთი შეეწია და ყველაფერს ჩასწვდა, დარწმუნდება: „როცა დიდია სიბრძნე, დარდიც დიდია; მრავლის შეცნობა ადამიანს წუხილს უმრავლებს“ (ეკლესიასტე, 1, 18).

იცოდა თუ არა ადამიანთა ცოდვაზე დაფიქრებულმა უცნობმა გუდამაყრულმა ეკლესიასტეს სიბრძნე? – ალბათ, არა. სამაგიეროდ, მან იცოდა, რომ სიცოცხლე სევდა არის, ადამიანდ ყოფნის ტკბილი სევდა; სიკვდილიც სევდა არის, ადამიანად არყოფნის სევდა. ეს სებამაც იცის და ამიტომაც სწამს: მიუხედავად დარდისა და წუხილის გამრავლებისა, წასვლას დარჩენა სჯობს!

27 ოქტომბერი, 2005 წელი

## შინაარსი

* ნუ გაახმოობთ მხარზე ამოსულ ნაძვს! -----	3
* მართალი ბუთულა ცოდვილთა შორის -----	14
* სიკეთისა და ბოროტების სამანი -----	22
* ვერ დარჩებოდა მაქსინაი დედამიწაზე -----	27
* ცოდვილის სიკვდილი -----	36
* რატომ ტირის გოდერძი ჩოხელი -----	45

ტექსტი ააწყო გვანცა ბურდულმა  
დააკაბადონა პაპუნა გურუღმა  
ყდა გააფორმა გიორგი ქავთარაძემ



გამომცემლობა „უნივერსალი“

თბილისი, 0179, ი. ჭავჭავაძის გამზ. 19, ☎: 22 36 09, 8(99) 17 22 30  
E-mail: universal@internet.ge